



Broj: 04-47-5-526-7/23VT  
Banja Luka, 04. 12. 2023. godine

Institut za intelektualno vlasništvo Bosne i Hercegovine (u daljem tekstu: Institut), na osnovu člana 13. stav (1) Zakona o kolektivnom ostvarivanju autorskog i srodnih prava („Službeni glasnik BiH“, br. 63/10; u daljem tekstu: Zakon), a u vezi sa članom 12. istog Zakona, postupajući po službenoj dužnosti d o n o s i

## R J E Š E N J E

### o nalaganju mjera za otklanjanje nepravilnosti u radu

1. **NALAŽE SE** Asocijaciji izvođača i svirača (AIS), Jošanička bb, Vogošća, provođenje sljedećih mjera za otklanjanje nepravilnosti u radu, i to:

- izvršiti isplatu naknada nosiocima prava (izvođačima muzičkih djela) u skladu sa Odlukom Upravnog odbora AIS-a, broj: UO 06-04/2022 od 18. 05. 2022. godine;
- izvršiti isplatu naknada izvođačima muzičkih djela iz Bosne i Hercegovine, koja su uplaćena AIS-u u 2022. godini (za period 2020. i 2021. godine), na osnovu Ugovora o recipročnom zastupanju zaključenog sa srodnom kolektivnom organizacijom za zaštitu prava interpretatora PI iz Srbije, u iznosu od 42.000 KM;
- da nadležni organi AIS-a uspostave mehanizam kontrole unosa programskih podataka dobijenih od korisnika, način obrade podataka i obračuna izvođačkih naknada, sve sa ciljem da se raspodjela naknada izvođačima muzičkih djela izvrši na osnovu podataka o stvarnom korištenju djela, te da izvrše cjelokupnu analizu i kontrolu unosa, obračuna i isplate izvođačkih naknada za 2022. godinu i 2023. godinu i Izvještaj o izvršenoj kontroli dostave Skupštini na razmatranje i usvajanje;
- izvršiti dopunu Revizorskog izvještaja AIS-a za 2022. godinu, u dijelu koji se odnosi na obračun i isplatu naknada nosiocima prava (izvođačima muzičkih djela) i
- sazvati sjednicu Skupštine AIS-a, na kojoj je potrebno razmotriti i usvojiti dokumenta predviđena članom 20. Zakona o kolektivnom ostvarivanju autorskog i srodnih prava, za 2022. godinu.

2. Rok za otklanjanje navedenih nepravilnosti u poslovanju je 120 dana od dana prijema ovog rješenja.

3. Ovo rješenje stupa na snagu danom donošenja.

## O b r a z l o ž e n j e

### Tok postupka

Postupajući po službenoj dužnosti, na osnovu člana 12. Zakona o kolektivnom ostvarivanju autorskog i srodnih prava („Službeni glasnik BiH“ br. 63/10) Institut za intelektualno vlasništvo BiH je dostavio Asocijaciji izvođača i svirača – AIS (u daljem tekstu: AIS), dopis broj 04-47-5-526/23VT od 26. 09. 2023. godine, kojim su obaviješteni da će ovlašteni službenici Instituta za intelektualno vlasništvo BiH, počev od 05. 10. 2023. godine, obaviti nadzor nad radom i izvršiti uvid u poslovne knjige i drugu poslovnu dokumentaciju kolektivne organizacije za 2022. godinu, u službenim prostorijama AIS-a, Jošanička bb, Vogošća.

WEB: [www.iivr.gov.ba](http://www.iivr.gov.ba); e-mail: [info@iivr.gov.ba](mailto:info@iivr.gov.ba)

Sjedište: 88000 Mostar, Kneza Domagoja bb.; e-mail: [mostar@iivr.gov.ba](mailto:mostar@iivr.gov.ba); Fax: +387 36 31 84 20;  
Tel: Protokol +387 36 33 43 81; Ured ravnatelja i zamjenika ravnatelja +387 36 33 43 82 (Mostar);

Ispostava Sarajevo: 71000 Sarajevo, Hamdije Čemerlića 2/9; e-mail: [sarajevo@iivr.gov.ba](mailto:sarajevo@iivr.gov.ba); Fax: +387 33 65 27 57; Tel: Protokol +387 33 65 27 65;  
Ispostava Banja Luka: 78000 Banja Luka, Akademika Jovana Surutke 13/3; e-mail: [banjaluka@iivr.gov.ba](mailto:banjaluka@iivr.gov.ba); Fax: +387 51 22 68 41; Tel: +387 51 22 68 40  
Odjeljenja: Nacionalni žig, Međunarodni žig +387 33 65 27 98; Patenti +387 33 61 80 95, +387 36 33 43 81;  
Industrijski dizajn, Autorsko i srodna prava +387 36 33 43 81;

Institut je izvršio nadzor nad radom AIS-a za 2022. godinu i usklađenost poslovanja sa Zakonom o kolektivnom ostvarivanju autorskog i srodnih prava, izdanom dozvolom, te opštim i internim aktima kolektivne organizacije. U postupku redovnog nadzora, Institut je ispitao i navode iz prigovora nosilaca prava (izvođača muzičkih djela) koje je zaprimio u 2023. godini, a koji su se odnosili na raspodjelu naknada izvođačima muzičkih djela. O izvršenom nadzoru je sačinjen Zapisnik.

U postupku nadzora nad radom AIS-a, službenici Instituta su kontrolisali pravnu i finansijsku dokumentaciju kolektivne organizacije, njene opšte i pojedinačne akte, ugovore sa stranim kolektivnim organizacijama, odluke Upravnog i Nadzornog odbora i Skupštine kolektivne organizacije i isplate naknada nosiocima prava. Institut je sačinio nacrt Zapisnika o nadzoru nad radom AIS-a za 2022. godinu, koji je dostavljen na očitovanje AIS-u, u roku od 5 dana od dana prijema nacrta Zapisnika.

AIS je u ostavljenom roku, dana 13. 11. 2023. godine, dostavio Institutu izjašnjene na nacrt Zapisnika o izvršenom nadzoru nad radom AIS-a za 2022. godinu, koje je potpisano od strane predsjednika Upravnog odbora AIS-a i direktorice Stručne službe AIS-a. Nakon toga je, dana 30. 11. 2023. godine Institut zaprimio e-mail od predsjednika i potpredsjednika Skupštine AIS-a, predsjednika i članova Nadzornog odbora i jednog člana Upravnog odbora, u kojem je navedeno da oni nisu na vrijeme dobili na uvid nacrt Zapisnika o nadzoru nad radom AIS-a za 2022. godinu, te da su isti dobili naknadno, na njihovo insistiranje (napominjemo da Institut u prapratnom aktu uz Zapisnik naznači da se Zapisnik o nadzoru dostavi predsjedniku Skupštine, Upravnog i Nadzornog odbora i direktoru Stručne službe). U e-mailu se navodi da oni nisu saglasni sa očitovanjem koji su uputili iz AIS-a i da se od istog ograđuju. Institut je nakon preispitivanja navoda iz očitovanja AIS-a na nacrt Zapisnika, sačinio konačni Zapisnik o nadzoru nad radom AIS-a za 2022. godinu, koji je dostavljen AIS-u na potpis.

### **Utvrđeno činjenično stanje**

U postupku nadzora nad radom Asocijacije izvođača i svirača službenici Instituta su utvrdili sljedeće nepravilnosti u poslovanju AIS-a:

AIS nije izvršio raspodjelu naknada izvođačima muzičkih djela u skladu sa Odlukom Upravnog odbora, odnosno nije izvršena raspodjela razlike sredstava u bruto iznosu od 272.135 KM (661.486 - 332.537-56.813). Odlukom Upravnog odbora AIS-a broj: UO 06-04/2022 od 18. 05. 2022. godine rezervisan je iznos sredstava za raspodjelu u bruto iznosu od 661.485,80 KM. Članom 3. navedene Odluke propisano je da će raspodjela naknada biti izvršena do 30.06.2023. godine, u skladu sa Statutom AIS-a, ovom Odlukom i utvrđenim principima raspodjele. U postupku nadzora utvrđeno je da je u 2022. godini izvršena raspodjela domaćim muzičkim izvođačima u bruto iznosu od 332.537 KM, odnosno u neto iznosu od 305.934 KM. Na osnovu recipročnih ugovora sa stranim kolektivnim organizacijama iz Srbije i Hrvatske (PI i HUZIP-u) raspodjeljen je iznos od 56.813 KM. AIS nije izvršio raspodjelu razlike sredstava u bruto iznosu od 272.135 KM. U skladu sa članom 7. stav (2) Zakona o kolektivnom ostvarivanju autorskog i srodnih prava kolektivna organizacija je dužna da od ukupno ostvarenih sredstava odvajaju samo sredstva za pokrivanje troškova svog rada, a sva druga sredstva obavezna je raspodijeliti svojim članovima.

AIS je u 2023. godini izvršio djelimičnu isplatu naknada muzičkim izvođačima (za 2022. godinu), ali bez dostavljanja pojedinačnih izvještaja nosiocima prava. Isplata naknada bez dostavljanja pojedinačnih izvještaja nosiocima prava je u suprotnosti sa članom 16. stav (1) Pravilnika o raspodjeli (broj: SK P21-05/21 od 10. 11. 2021. godine) kojim je propisano da se pojedinačni obračun dostavlja izvođaču, odnosno nosiocu izvođačkih prava prilikom isplate i da isti sadrži sljedeće podatke: ime i prezime izvođača, njegovu adresu i broj računa; bruto iznos naknade za svako djelo i ukupan iznos; iznos poreza i drugih odbitaka; neto iznos izvođačke naknade; ime osobe odgovorne za obračun i uputu o pravu na zahtjev za naknadni obračun ili ispravak obračuna.

AIS nije izvršio raspodjelu naknada za isplatu domaćih muzičkih izvođača koja su uplaćena AIS-u u 2022. godini (a odnose se na period 2020. i 2021. godina) od srodne kolektivne organizacije za zaštitu prava

interpretatora PI iz Srbije, u iznosu od 42.000 KM, što je protivno članu 12. Pravilnika o raspodjeli, kojim je propisano da se izvođačke naknade isplaćuju nakon primanja naknada iz inostranstva, u pravilu istovremeno s redovnom godišnjom isplatom, a najkasnije šest mjeseci od kraja finansijske godine u kojoj je prihod od prava ostvaren. Do dana vršenja nadzora nad radom AIS-a, ove isplate nisu izvršene.

U postupku nadzora službenici Instituta su dobili informaciju da Stručna služba AIS-a ne vrši kontrolu unosa, obračuna i isplate izvođačkih naknada, što je u suprotnosti sa članom 34. stav IV Statuta AIS-a, kojim je propisano da Stručna služba obavlja stručne poslove koji se odnose na prijem i obradu prijave za korištenje djela iz repertoara udruženja od strane korisnika i priprema prijedloga obračuna naknada prema dostavljenim izvještajima od strane korisnika o korištenju izvedbi i rezultatima njihove kontrole, u skladu sa ZKOASP-om, propisima SCAPR-a, te u skladu sa osnovnim principima i pravilima raspodjele utvrđenim 13. ovim Statutom i principima i pravilima raspodjele detaljno utvrđenim Pravilnikom o raspodjeli. Prema informacijama dobijenim u postupku nadzora, unos programskih podataka koji dostavljaju korisnici vrši firma sa sjedištem u USA, dok obradu podataka vrši drugo pravno lice na osnovu zaključenog Ugovora sa AIS-om. Potrebno je da nadležni organi AIS-a uspostave kontrolni mehanizam unosa programskih podataka, načina obrade istih i obračuna izvođačkih naknada, sve sa ciljem da se raspodjela naknada izvođačima muzičkih djela izvrši na osnovu podataka o stvarnom korištenju djela, te da izvrše cjelokupnu analizu i kontrolu unosa, obračuna i isplate izvođačkih naknada za 2022. godinu i 2023. godinu. Izvještaj o izvršenoj kontroli potrebno je dostaviti Skupštini na razmatranje i usvajanje.

Uvidom u Revizorski izvještaj AIS-a za 2022. godinu, utvrđeno je da u istom nisu navedeni podaci o iznosu isplaćenih naknada izvođačima muzičkih djela, koji se odnosi na isplaćene naknade u 2022. godini, niti je revizor naveo podatke o izvršenoj kontroli obračuna i isplate naknada izvođačima muzičkih djela. Revizor je u izvještaju samo konstatovao koliko je sredstava rezervisano za naredne isplate. Ovi podaci su bitni jer predstavljaju suštinu poslovanja kolektivne organizacije, koja ostvaruje prihode isključivo od korištenja prava svojih članova i tako upravlja tuđim novcem. Od svih ukupno ostvarenih sredstava kolektivna organizacija odvaja samo sredstva za pokrivanje troškova svog rada, a sva druga sredstva dužna je raspodijeliti nosiocima prava, po unaprijed utvrđenim pravilima raspodjele. Članom 20. stav (1) tačka b) navedenog Zakona je propisano da kolektivna organizacija mora za svaku poslovnu godinu, u roku od šest mjeseci poslije njenog završetka, usvojiti, odnosno pribaviti izvještaj revizorske kuće o izvršenoj kontroli finansijsko-računovodstvene dokumentacije, zajedno s nalazom ovlaštenog revizora o pravilnosti i usklađenosti poslovanja kolektivne organizacije s odredbama ovog zakona, s aktima kolektivne organizacije i sa zaključenim ugovorima. Da bi ovlašteni revizor mogao dati traženo mišljenje mora izvršiti kontrolu obračuna i isplate naknada nosiocima prava.

U postupku nadzora nad radom AIS-a je utvrđeno da Ministarstvo pravde Bosne i Hercegovine nije verifikovalo Skupštinu AIS-a održanu dana 30. 06. 2023. godine, odnosno AIS je povukao zahtjev za upis promjena u upis promjena u Registru udruženja i fondacija. U postupku nadzora predstavnici Instituta su tražili na uvid poziv Ministarstva pravde Bosne i Hercegovine - Obavještenje, poziv na ispravku i dopuna Zahtjevu AIS-a za upis promjena u Registru udruženja (broj: UP09-07-1-1961/23 od 17.08.2023. godine), u kojem je Ministarstvo pravde utvrdilo da zahtjev nije potpun, te da sadrži nedostatake i nepravilnosti zbog kojih nije moguće izvršiti upis u Registru udruženja. Te nepravilnosti se odnose na kvorum i pravila glasanja, koja nisu u skladu sa Statutom AIS-a. Važećim Statutom AIS-a nije izričito propisano da pravo učešća u radu i odlučivanju na Skupštini redovni članovi mogu ostvarivati putem punomoćnika odnosno ovlaštenja, a pravila o kvorumu i glasanju se ne mogu derogirati pravnim aktima niže pravne snage. S tim u vezi, priznavanje prisustva i glasanja redovnih članova na sjednici Skupštine udruženja putem punomoćnika nije u skladu sa važećim Statutom AIS-a. Uvidom u Zapisnik broj: 610 od 30. 06. 2023. godine Ministarstvo pravde je utvrdilo da je 78 članova lično prisustvovalo sjednici Skupštine, što su potvrdili svojeručnim potpisom na označenom mjestu, a preostalih 29 je potpisano po punomoći. S obzirom da na sjednici Skupštine AIS-a, koja je održana u junu 2023. godine nije postojao kvorum za punovažno odlučivanje i donošenja odluka, potrebno je sazvati sjednicu Skupštine AIS-a, na kojoj će se razmotriti i usvojiti dokumenta predviđena članom 20. Zakona o kolektivnom ostvarivanju autorskog i srodnih prava, za 2022. godinu.

Na osnovu naprijed utvrđenog činjeničnog stanja, u skladu sa članom 13. stav (1) Zakona, odlučeno je kao u dispozitivu ovog rješenja.

**Pouka o pravnom lijeku:** Ovo rješenje je konačno u upravnom postupku. Protiv ovog rješenja može se pokrenuti upravni spor, podnošenjem tužbe Sudu Bosne i Hercegovine u roku od 60 dana prijema ovog rješenja.

DOSTAVLJENO:  
-AIS, Jošanička bb,  
71 230 Vogošća  
-a/a

